

МЕСЯЦА ОКТЯБРЯ В 5-Й ДЕНЬ.

**СОБОР СЯТИТЕЛЕЙ МОСКОВСКИХ: ПЕТРА, АЛЕКСИЯ, ИОНЫ,
ФИЛИППА И ЕРМОГЕНА, ВСЕЯ РОССИИ ЧУДОТВОРЦЕВ.**

НА ВЕЛИЦЕЙ ВЕЧЕРНИ,

Блажен муж:

На Господи воззвах, стихиры, глас 4.

Подобен: Яко добля:

Яко звезды многосветлыя, * утверждени прехвальнии, * мир украсисте, * всечестнии, * и сей лучами просвещаете, * догматы благоверия, * и ереси тьму отгоните, * святителие. Молитесь от тли и бед избавитися * верою творящим всечестную память вашу.

Сиянии духовными просветивше вселенную, * светодательная солнца явистесь, * яко лучи велений во вся концы простирающе, * верных сердца просвещаете, * треблажении, отгоняюще тьму ересей, богоносцы, * силою от Девы Возсиявшаго.

Апостолом равнопроповедателie, * святителем единомудрении, постником сподвижницы, * пастырие суще избраннии, милости благоутробнии подателie, * Российстии первопрестольницы, * достойно восхваляем вас, святителие, * Ангелом собеседницы и молитвенницы о душах наших.

Ины стихиры, глас 6.

Подобен: Все отложивше:

Воистину священнейшии и богоноснии, * явльшеся помазание Божественное, святии, * Святым Духом обложени, * и светло всегда входяще, * славнии, во святая святых, * и светлостью Богоначальными облистаеми благодатию, * и поучающеся спасительным Тайнам, * яко священнотайныя суще первопрестольницы Российстии, * со дерзновением молитесь о душах наших.

Житие ваше просия добродетельными блистаньми, * и верныя просветисте, прелести бурю развеясте, * поистинне явистесь светозарное солнце, * священноначальницы всеблаженнии, * вселистесь, идеже Свет сияет невечерний, * сынове дне благодатию Святаго Духа бывше. * И тем вашу память Божественную * и светоносный праздник совершаем, * и веселящеся, вас ублажаем.

Ночь потребльше еретическую всю, * священноначальницы всемудрии, * Петре, Алексие, Ионо, Филиппе и Ермогене, * блистаньми духовными просвещаеми, * и верным всем, славнии, помышления озаривше благодатию, * и Троицу Несозданную славити научивше. * Тем светозарную вашу память совершающе радостно, просим: * молитесь Христу, Преблагому Богу, * неотступно, всехвальнии, о душах наших.

Слава, глас 6:

Человецы Божии и вернии раби, * служителие Господни, * мужие желания, сосуди избраннии, * столпы и утверждение Церкви, * Царствия наследницы, * не премолчите, * еже о нас вопити ко Господу.

И ныне, глас тойже:

Кто Тебе не ублажит, Пресвятая Дево; * кто ли не воспоеет Твоего Пречистаго Рождества; * безлетно бо от Отца Возсиявый Сын Единородный, * Тойже от Тебе, Чистыя, пройде, * неизреченно воплощя: * естеством Бог сый, * и естеством быв Человек нас ради, * не во двою лицу Разделяемый, * но во Двою Естеству * неслитно Познаваемый. * Того моли, Чистая, Всеблаженная, * помиловатися душам нашим.

Вход. Прокимен дне. Чтения 3 святительския.

Притчей чтение (глава 3):

Память праведнаго с похвалами, и благословение Господне на главе его. Блажен человек, иже обрете премудрость, и смертен, иже уведе разум. Лучше бо сию куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней и лета живота в деснице ея, в шуйце же ея богатство и слава. От уст ея исходит правда, закон же и милость на языке носит. Послушайте убо мене, о чада! честная бо реку, и блажен человек, иже пути моя сохранит. Исходи бо мои, исходи живота, и уготовляется хотение от Господа. Сего ради молю вас и предлагаю мой глас сыновом человеческим: яко аз премудрость устроих, совет, и разум, и смысл аз призвах. Мой совет и утверждение, мой разум, моя же крепость. Аз мене любящия люблю, ищущий же мене обрящут благодать. Разумейте убо, незлобвии, коварство, ненаказанныи же, прилагайте сердца. Послушайте мене и паки, честная бо реку, и отверзу от устен правая, яко истине поучится гортань мой, мерзски же предо мною устны лживыя. С правдою вси глаголы уст моих, ничтоже в них стропотно, ниже развращено. Вся права суть разумевающим, и проста обретающим разум. Научаю бо вас истине, да будет о Господе надежда ваша, и исполнитесь Духа.

Премудрости Соломоновы чтение (глава 10):

Уста праведнаго каплют премудрость, устне же мужей мудрых ведут благодать. Уста мудрых поучатся премудрости, правда же избавляет их от смерти. Скончавшуся мужу праведну, не погибнет надежда. Сын бо праведен раждается в живот, и во благих своих плод правды обымет. Свет праведным всегда, и от Господа обрящут благодать и славу. Язык мудрых добрая свесть, и в сердце их почиет мудрость. Любит Господь преподобная сердца, приятни же Ему вси непорочнии в пути. Мудрость Господня просвещает лице разумнаго. Постигает бо желающий ю, прежде даже разумети ю, и удобь узрится от любящих ю. Утреневавый к ней, не утрудится, и бдяй ея ради, вскоре без печали будет. Яко достойных ея сама обходит ищущи, и в стезях ея является им благоприемне. Мудрости никогдаже одолеет злоба. Сих ради и рачитель бых доброты ея, и возлюбих ю, и поисках от юности моя, и взысках невесту привести себе, яко всех Владыка возлюби ю. Таибница бо есть Божия хитрости, и обретательница дел Его. Труды ея, суть добродетели, целомудрию же и разуму та учит, правде и мужеству, ихже потребив ничтоже есть в житии человеком. Аще же и многоискусства желает кто, весть древняя и быти хотящая разсмотрит. Свесть извития словес и разрешения гаданий, знамения и чудеса проразумеет и сбытия времен и лет. И всем советник есть благ, яко безсмертие есть в ней и благославие во общении словес ея. Сего ради беседах ко Господу, и помолихся Ему, и рех от всего сердца моего: Боже отцев и Господи милости, сотворивый вся словом Твоим и мудростию Твоею устроивый человека, да владеет

бывшими от Тебе тварьми и да управляет мир в преподобии и правде. Дажь ми Твоим Престолом приседающую премудрость и не отлучи мене от отрок Твоих, яко аз раб Твой и сын рабыни Твоея. Посли ю с Небес от святого жилища Твоего, и от Престола Славы Твоея, да сущи со мною научит мя, что благоугодно есть пред Тобою, и наставит мя в разум, и сохранит мя в славе своей. Помышления бо смертных вся боязлива и погрешительна умышления их.

Премудрости Соломоновы чтение (глава 4):

Похваляему праведнику, возвеселятся людие: безсмертие бо есть память его, яко от Господа познавается и от человек, и угодна Господеви душа его. Возлюбите убо, о мужие, мудрость и поживете: восхощите ея и наказани будете. Начало бо ея любви и соблюдение закона. Почтите премудрость, да во веки царствуете. Возвещу вам и не скрью от вас таин Божиих, яко Той мудрости Наставник есть, и мудрых Исправитель, и всякому смыслу и делу Хитрец. И всем смыслом научит мудрость, есть бо в ней Дух Разумен и Свят, и сияние Света присносущнаго, и образ благодати Божия. Тая други Божия и пророки устроает, благолепнейши же есть солнца и паче всякаго сотворения звезд, свету сосуждаема, обретается первейши. Тая угождающих ей от болезни избави и настави на стези правыя. Даде им разум имети свят, и сохрани я от ловащих, и подвиг крепок подаде им. Да разумеют вси, яко сильнейши всего есть благочестие, и никогдаже преможет злоба мудрости, ниже преидет злыя обличающи суд. Рекоша же в себе, помысливше неправедно: насильствуем праведному, и не пощадим преподобства его, ни усраимся седин старости многолетны. Будет бо нам крепость закон и уловим праведнаго, яко неугоден нам есть, и противится делом нашим, и поносит нам отпадение закона, и обличает нам согрешения наказания нашего. Возвещает нам разум имети Божий, и отрока Господня себе именует. Бысть нам на обличение помышлений наших и тяжек нам есть и видим, яко неподобно иным житие его, и изменены стези его. В поругание вменихомся ему, и удаляется от путей наших, яко от нечистот, и блажит последняя праведных. Увидим убо, аще словеса его истинна суть, искусим, яже сбываются ему. Руганием и мукою истяжем его, да разумеем кротость его и искусим беззлобство его, смертию безобразною осудим его, будет бо посещение от словес его. Сия помыслиша и прельстишася, ослепи бо я злоба их, и не разумеша таин Божиих и не разсудиша, яко Ты еси Бог Един, живота имей и смерти власть, и спасай во время скорби, и избавляй от всякаго зла. Щедр и Милостив, и дай преподобным Своим благодать, и Своею мышцею гордым противляйся.

На литии стихиры, глас 2:

Приидите, верных собори, * псаломски восплещем руками * печальным утешителей, * о грешных ко Господу молитвенники, * иже вси везде теплых предстателей воспевающе, * святителей Петра, Алексия, Иону, Филиппа и Ермогена, * похвалу земли Российстей * и всего священства украшение, * реки милости воистинну, * Божественнаго Христова смирения ревнителей, * подающаго миру велию милость.

Имеюще дерзновение ко Господу, * пастырие всесвященнии и святителие, верным утверждение, * иже любовию творящим всечестную память вашу, * молитве избавитися всякаго обстояния и варварскаго нахождения * ко Владыце вашими молитвами.

Разумнии церковнии светильницы, * Троице поборницы, Российстии первопрестольницы, * мглу прелести отгнавши и православия светом мир просветивши, * темже и сподобитесь Божественной славе быти причастницы, * молитесь Христу Богу непрестанно * даровати нам велию милость.

Слава, глас 5:

Вострубим трубою песней, * възграим празднественная и ликовствуим, радующеся, * в молебное торжество мудрых священноначальник. * вернии люди да стекутся, и Церкви Христовы светильником восплещут в песнях. * Пастырие и учителя добраго Пастыря, * сих мудрых священноотцаинник, сошедшеся, восхвалим, * светильники светозарныя, светоприемныя свещи, * столпы церковныя, * веры крепкая основания, ластовицы, Божественную весну провозвещающия спасения, * трубы, музическийски возглашающия, * песньми Божественными восхваляюще, сие рцем: * святии чудотворцы, Петре, Алексие, Ионо, Филиппе и Ермогене, * скоро предварите, и избавите нас * от нахождений иноплемennых и междоусобных брани, * и спасите стадо свое молитвами вашими.

И ныне, Богородичен:

Вострубим трубою песней: * преклоншиися бо свыше, Всецарица, Мати Дева, * благословенными венчаваеи воспевающих Ю. * вернии люди да стекутся, * и Царице да восплещут в песнях, * Царя рождающей, * Иже смертию одержимыя первее разрешити человеколюбно благоизволившаго. * Пастырие и учителя, * добраго Пастыря Пречистую Матерь, сошедшеся, восхвалим, * свещник златозарный, светоносный облак, * Небес пространнейшую, * одушевленный же кивот, огнезрачный Владычень Престол, * манноприемную златую стамну, * заключенную Слова дверь, * всех христиан прибежище, * песньми Богогласными похваляюще, сие рцем: * палато Слова, сподоби смиренных нас Небеснаго Царствия: * ничтоже бо невозможно ходатайству твоему.

На стиховне стихиры, глас 2:

Киими песненными добротами * воспоем Христовых святителей, * Евангелию проповедников светлейших, * церковных хранителей и заступников земли Российстей, * наставников ко свету Богоразумия, * ихже молитвами Христос врагов * шатания низложи, * имей велию милость.

Стих: Честна пред Господем смерть преподобных Его.

Киими бодренными устнами * похвалим Богомудрых святителей, * Христове Церкви светлое украшение, * священства венцы, благочестия управление, * источников Божественных исцелений неизчерпаемых, * пролитие дарований духовных, * реки многих чудес, землю Российскую веселящия течением, * Петра, Алексия, Иону, Филиппа и Ермогена, * отечеству теплыя пособники, * ихже ради Христос врагов шатания низложи, имей велию милость.

Стих: Священницы Твои облечутся в правду, и преподобнии Твои возрадуются.

Киими украшенными гласы воспоем святители, * дивныя в чудесех, Петра, Алексия, Иону, Филиппа и Ермогена, * освященныя от пелен, столпы Церкви неподвижныя, * безплотным сожители, * правды исправление, обидимым заступники, * немощным врачии безмездныя, * ихже ради дарова Христос Церквам соединение, * мир и велию милость.

Слава, глас 3:

Святителие всечестнии, преблаженнии отцы и чудотворцы, * угодницы Христовы, Российстии первопрестольницы, * Петре, Алексие, Ионо, Филиппе и Ермогене, * иже пророческим житием просиявше, * апостольских сподобистесе даров, * Спасу служаще со Ангелы непрестанно, * молити избавитися нам от всякаго прегрешения, * и душам нашим подати мир и велию милость.

И ныне, Богородичен:

Без семени от Божественнаго Духа, * волею же Отчею зачала еси Сына Божия, * от Отца без матери прежде век суща: * нас же ради, из Тебе без отца бывша, * плотию родила еси, * и Младенца млеко питала еси. * Темже не престай молити, * избавитися от веда душам нашим.

Тропарь, глас 4:

Первопрестольницы Российстии, * истиннии хранителие апостольских преданий, * столпи непоколебимии, православия наставницы, * Петре, Алексие, Ионо, Филиппе и Ермогене, * Владыку всех молити, * мир вселенней даровати * и душам нашим велию милость.

Слава и ныне, Богородичен.

Еже от века утаенное, * и ангелом несведомое таинство: * Тобою Богородице сущым на земли явился Бог, * в неслитном соединении воплощаемь, * и крест волею нас ради восприим, * имже воскресив первозданнаго, * спасе от смерти души наша.

НА УТРЕНИ

На Бог Господь: тропарь глас 4:

Первопрестольницы Российстии, * истиннии хранителие апостольских преданий, * столпи непоколебимии, православия наставницы, * Петре, Алексие, Ионо, Филиппе и Ермогене, * Владыку всех молити, * мир вселенней даровати * и душам нашим велию милость. [Дважды.]

Слава и ныне, Богородичен.

Еже от века угаенное, * и ангелом несведомое таинство: * Тобою Богородице сущым на земли явился Бог, * в неслитном соединении воплощаемь, * и крест волею нас ради восприим, * имже воскресив первозданнаго, * спасе от смерти души наша.

По 1-м стихословии седален, глас 5

Подобен: Собезначальное Слово:

Яко царское украшение Церкви, * святителей Господних восхвалим, * преданием сокровище неоскудеемо, * сими бо тии наказаше нас Троицу чести Святую, * соединену убо Существом, * разделену же Ипостасьми.

Слава, и ныне, Богородичен:

Пресвятая Дево, помилуй нас, * прибегающих верою к Тебе, Милосердой * и просящих теплаго Твоего заступления, * можещи бо яко Блага вся спасти, * яко сущи Мати Бога Вышняго, * Матерними Твоими молитвами присно объемлющи, Богорадованная.

По 2-м стихословии седален, глас 3.

Подобен: Божественныя веры:

Столпи бысте Церкви * и богатство некрадомое благочестия, * явились есте Богословеснии святителие, * в безстрастии осияли есте житие свое * и Троическая изъясняете учения повелений, * отцы преподобнии, * Христа Бога молити о спасении душ наших.

Слава, и ныне, Богородичен:

Божественнаго естества не отлучься, * плоть быв во чреве Твоем, * но Бог вочеловечься и пребысть, * Иже по рождестве Матерь Тя Деву, * яко прежде рождества сохранив Всенепорочну, * Един Господь, Того прилежно моли * даровати нам велию милость.

По Хвалите Имя Господне: величание:

Величаем вас, * святителие Христовы, * Петре, Алексие, Ионо, Филиппе и Ермогене, * и чтим святую память вашу, * вы бо молити за нас * Христа Бога нашего

Псалом избранный: Услышите сия вси языцы:

По полиелеи седален, глас 4:

Премудрии учителяе вселенней, * иже Бога славяще словесы и дела на земли, * да возвеличатся днесь, * яко спасения всем нам подателие.

Слава, и ныне, Богородичен:

Предстательнице нератная, Богородительнице, * и молитвою готовая притекающим к Тебе, * от бед мя избави * и не презри мене, всех заступление.

Таже степенна, 1-й антифон 4-го гласа.

Прокимен: Честна пред Господем * смерть преподобных Его́.

Стих: Что воздам Господеви о всех, * яже воздаде ми?

Всякое дыхание:

Евангелие от Иоанна, зачало 36.

Рече Господь ко пришедшим к Нему иудеем: Аз есмь дверь, Мною аще кто внидет, спасется, и внидет, и изыдет, и пажить обрящет. Тать не приходит, разве да украдет, и убьет, и погубит, Аз приидох, да живот имут и лишше имут. Аз есмь пастырь добрый, пастырь добрый душу свою полагает за овцы. А наемник, иже несть пастырь, емуже не суть овцы своя, видит волка грядуща и оставляет овцы, и бегаєт, и волк расхитит их, и распудит овцы. А наемник бежит, яко наемник ест и не радит о овцах. Аз есмь пастырь добрый, и знаю Моя, и знают Мя Моя. Якоже знает Мя Отец, и Аз знаю Отца, и душу Мою полагаю за овцы. И ины овцы имам, яже не суть от двора сего, и тыя Ми подобает привести, и глас Мой услышат, и будет едино стадо, и един Пастырь.

По 50-м псалме стихира, глас 6:

Божественная благодать осеняет * всечестные раки мощей ваших, преблаженнии, * темже и в воню мира чудес ваших притекающе, * недугом исцеления почерпаем, * но, о святителие Христовы, Петре, Алексие, Ионо, Филиппе и Ермогене, * Христа Бога молитесь о душах наших.

Канон Богородице со ирмосом на 6, таже святителей, на 8, глас 8

Песнь 1

Ирмос: Воду прошел, яко сушу, * и египетскаго зла избежав, * израильтянин вопияше: * Избавителю и Богу нашему поим.

Многими содержими напастьми, к вам прибегаем спасение получитьи, о велиции святителие, Петре, Алексие, Ионо, Филиппе и Ермогене! От лютыя нужды и бед спасите нас.

Страстей прилози и многия печали и беды погубляют мою душу; умирите, святии святителие, к Богу вашими молитвами, и от печали на веселие предложите.

Спаса Христа молитесь, велиции чудотворцы и избраннии, Петре, Алексие, Ионо, Филиппе и Ермогене, избавитися нам от бед и скорбей и варварскаго нахождения вашими молитвами.

Богородичен: В скорби ны и болезни суща, посещения Божественнаго и промышления еже от Тебе сподоби, о Богомати, Владычице.

Катавасия: Отверзу уста моя:

Песнь 3

Ирмос: Небеснаго круга Верхотворче, Господи, * и Церкви Зиждителю, * Ты мене утверди в любви Твоей, * желаний краю, * верных утверждение, * Едине Человеколюбче.

Заступницы и покровителие граду Москве вы есте по Бозе, Божии угодницы, направите нас на пристанище спасения: вы бо есте верным ограждение.

Молим вас, святии чудотворцы, Петре, Алексие, Ионо, Филиппе и Ермогене, душевное смущение и печали бурю разорите нам и тишину подати к Богу вашими молитвами.

Благороднейшии и благим подражателие бывше, от Бога чудесы обогатившеся, всем помогайте, молящеся Богу, вас прославляющему, Своя угодники.

Богородичен: Лютыми недуги и болезненными тяжкими варварскими находы истязаемым, Дево Богородице, Ты нам помози и печаль на радость преложи.

Седален, глас 4:

Прострите ваша длани, святии отцы, ко всех Владыце, * имиже добре потрудитесь, и Богу угодите, * и требующим неоскудно подасте, * и устно ваша на молитву отверзите, * имиже Бога славословисте, * и люди на Богоразумие настависте, * ускорите убо на помощь нашу, * и от находящих на нас бед и зол * и всякия нужды избавите нас вашими молитвами к Богу.

Слава, и ныне, Богородичен:

Дево Всенепорочная, * Яже Пресущнаго Бога рождающая, * со святители Того непрестанно моли, * оставление прегрешений * и исправление жития дати нам прежде конца, * верою и любовию поющим Тя по долгу, * Единая Всепетая.

Песнь 4

Ирмос: Услышах, Господи, * смотрения Твоего таинство, * разумех дела Твоя * и прославих Твое Божество.

Страстей моих смущение и многих бед нахождения бурю утишити молитесь, святии отцы, к Богу вашими молитвами.

Милосердия бездну прострите нам, святии отцы, призывающим вас на помощь, яко Милосердаго Бога имате, слушающая ваших молитв.

Надежду имуща вас, святии отцы, Петре, Алексие, Ионо, Филиппе и Ермогене, и яко стену недвижиму к Богу ваша молитвы, зол и всех бед избавляемся.

Богородичен: Исцели, Чистая, душевныя наша немощи и страсти телесныя, поспеши, Госпоже, здравие подати молитвами Твоими.

Песнь 5

Ирмос: Просвети нас повелении Твоими, Господи, * и мышцею Твоею высокою * Твой мир подаждь нам, * Человеколюбче.

Исполните, святии отцы, веселия живот наш, избавляюще нас варварскаго нахождения и междуособных брани.

Избавите нас от бед, святии чудотворцы, яко предстателие теплии и молитвенницы о душах наших.

Разрушите мглу прегрешений моих и безместных деяний вашими к Богу молитвами.

Богородичен: Яко стену нерушиму и пристанище стяжахом, и душам Тя совершенное спасение, и пространство в скорбех, о Владычице, ныне нас от страстей и бед спаси.

Песнь 6

Ирмос: Молитву пролию ко Господу * и Тому возведу печали моя, * яко зол душа моя исполнися, * и живот мой аду приближися, * и молюся, яко Иона: * от тли, Боже, возведи мя.

Смерти и тли, и варварскаго пленения избавите, и огненнаго запаления свой град сохраните к Богу вашими молитвами.

Заступники вас вемы и твердыя хранители граду нашему, святителие Господни, тем к вам прибегающе, милость приемлем и бед избавляемся.

Яко стену и пристанище стяжахом вас, святии чудотворцы, пространство в скорбех подтверждение и спасение душам нашим.

Богородичен: Заступницу Тя живота веи и Хранительницу тверду, Дево, напастей рещашу молвы и налоги бесов отгоняюще и молюся всегда страстей мя избавити, Всенепорочная.

Кондак, глас 3

Подобен: Дева днесь:

Во святителех благочестно пожисте * и люди к Богоразумию настависте, и добре Богу угодисте, * сего ради от Него нетлением и чудесы прославистесь, * яко ученицы Божия благодати.

Икос: Первозваннаго наместницы и Российстии первопрестольницы, велиции светильницы, Петре, Алексие, Ионо, Филиппе и Ермогене, Троице поборницы, православию наставницы, в мире благочестно пожисте и учением своим вселенную просветисте, сего ради Царствию Небесному наследницы бысте, нетлением и чудесы прославистесь, яко ученицы Божия благодати.

Песнь 7

Ирмос: От Иудеи дошедше отроцы, * в Вавилоне иногда * верою Троическою пламень пещный попраша, поюще: * отцев Боже, благословен еси.

Наше спасение, якоже восхотел еси, Спасе, устроити, прославляеши Твоя угодники чудесы, вопиющия Ти: отец наших Боже, благословен еси.

Волителя милости, Еюже род и Мати, молите, святии Христовы святителие, Петре, Алексие, Ионо, Филиппе и Ермогене, избавити нас от прегрешений, и бед, и зол, зовущих: отец наших Боже, благословен еси.

Сокровище спасения и источник исцеления, наставницы покаяния вы есте, Божии угодницы, вопиющим: отец наших Боже, благословен еси.

Богородичен: Сокровище спасения, и источник нетления, Тебе рождающую и столп утверждения, и дверь покаяния вопиющим показа: отец наших Боже, благословен еси.

Песнь 8

Ирмос: Царя Небеснаго, * Еюже поют вси Ангельстии, * хвалите и превозносите во вся веки.

Помощи вашае требующия не презрите, святии отцы и наставницы Православия, поющия и превозносящия Христа во веки.

Неможение душ наших исцеляете и от телесных болезней возставляете вопиющих и превозносящих Христа во веки.

Исцелений богатство источаете к вам притекающим, Божиим угодником, и верно поющим, и превозносящим Христа во веки.

Богородичен: Напастныя Ты прилоги отгоняеши и страстныя находы, Дево, яко да Тя поем и превозносим Чистую во веки.

Песнь 9

Ирмос: Воистинну Богородицу * Тя исповедуем, * спасеннии Тобою, Дево Чистая, * с Бесплотными лики Тя величающе.

Точения слез не презрите, молим вас, святии отцы, Петре, Алексие, Ионо, Филиппе и Ермогене, и всем утешение подати, блажащим вас.

Радости сердца наша исполните вашими к Богу молитвами, святии отцы и заступницы теплии.

Светильницы пресветлии, Троицы поборницы, Петре, Алексие, Ионо, Филиппе и Ермогене, труды и подвиги вашими мрак неведения отгоняшесь, благоверно вас ублажающих.

Богородичен: Света Твоего зарями просвети, Дево, мрак неведения отгоняючи и лютых бед спасаючи, иже благоверно Богородицу Тя исповедающих.

Светилен.

Светозарныя светильники паче солнечных луч * от Светоначальныя Троицы и Трисолнечныя Единицы паче естества смешены, * Богоносныя восхвалим отцы.

Богородичен:

Тебе песньми немолчными ублажаем, Дево, * Яже от Троицы Единого во чреве приемши, Богородице, * Божественными руками Пресущное Слово носивши, * непреложно и неизменно.

На хвалитех стихиры на 6, глас 8.

Подобен: О преславнаго чудесе:

Имей души милостиву * и чист помысл, и сердце несмущенно, * и веру непорочну, * и любовь нелицемерну, * учительство изрядно, * и святительства достоинство, * и ныне ликом святителей сопричтался еси на Небесех, * сего ради почитаем тя, святителю Петре, * священными песньми благочестно вси ублажаем.

О пречестный отче, досточудне премудре Алексие, * ты иноческим житием Богу угодил еси, * ты Бог прежде избра от юности * пастыря овцам словесным и учителя велика; * ты священником наказатель явился еси * и всей стране Российской звезда пресветлая, * осияваючи чудесы всех, * верою припадающих к раце мощей твоих, * тем первосвятителей лик ты восприял, * с нимиже молися, прося стаду твоему грехов оставление.

Отче Ионо, Богомудре святителю, * ты измлада Христа возлюбив, * и Того любви прилепился еси, * и от Него Пресвятаго Духа * Божественными зарями сердце твое просветив, * световиден воистинну был еси, * темже иже ко храму твоему притекающия * прошения ко спасению сподоби * и моли Христа Бога спастися душам нашим.

Течение совершил еси и веру соблюл еси, * святителю блаженне Филиппе, * сего ради Христос тя венча светлым венцем правды * и украси твое исповедание,

досточудне. * Тем Небесное наследие прием, * Спасу молися о воспевающих память Твою.

Глас 7:

Сотворите в песнях суд написан: * слава сия будет великому Ермогену, * той бо есть Православия ревнитель * и вся Руси хранитель, * яко орел, птенцы своя покрываяй.

Глас 8:

О пречестнии досточуднии отцы, * Петре, Алексие, Ионо, Филиппе и Ермогене! * Порученный вам талант умноживше, * радости сподобистесь Господа своего * и ныне предстоите с лики святителей, * украшени благодатию Божественного сияния, * темже верою и любовию * пресветлую вашу память восхваляем, * Христа величающе, * прославльшаго Своя угодники.

Слава, глас 6:

Добрии раби, блазии и вернии, * и добрии делатели винограда Христова, * вы тяготу дневную понесли есте, * и данный вам талант возрастивше, * и по вас пришедшим не завидевше, * темже и дверь Небесная вам отверзется, * внидите в радость Владыки Христа, * молящися о нас, святии учителяе.

И ныне: Богородице, Ты еси лоза истинная:

НА ЛИТУРГИИ

Блаженны, песнь 3-я и 6-я.

Прокимен: Честна пред Господем смерть преподобных Его́.

Стих: Что воздам Господеви о всех, яже воздаде ми?

Апостол ко Евреом, зачало 335.

Братие, повинуйтеся наставником вашим и покаяйтесь, тии бо бдят о душах ваших, яко слово воздати хотяще, да с радостию сие творят, а не въздыхающе, несть бо полезно вам сие. Молитесь о нас, уповаем бо, яко добру совесть имамы, во всем добре хотяще жити. Лишше же молю, сие творите, да вскоре устроюся вам. Бог же мира, возведый из мертвых Пастыря овцам великаго, кровию завета вечнаго, Господа нашего Иисуса Христа, да совершит вы во всяком деле блазе, сотворити волю Его, творя в вас благоугодное пред Ним, Иисус Христом. Емуже слава во веки веков. Аминь.

Аллилуя: Священницы Твои облуктятся в правду, и преподобнии Твои возрадуются.

Стих: Внидем в селения Его:

Евангелие Матфея, зачало 11.

Рече Господь Своим учеником: вы есте свет мира, не может град укрытися верху горы стоя. Ниже вжигают светилника и поставляют его под спудом, но на свещнице, и светит всем, иже в храмине суть. Тако да просветится свет ваш пред человеки, яко да видят ваша добрая дела и прославят Отца вашего, Иже на небесех. Да не мните, яко приидох разорити закон, или пророки: не приидох разорити, но исполнити. Аминь бо глаголю вам: дондеже преидет небо и земля, иота едина, или едина черта не преидет от закона, дондеже вся будут. Иже аще разорит едину заповедий сих малых и научит тако человеки, мний наречется в Царствии Небеснем, а иже сотворит и научит, сей велий наречется в Царствии Небеснем.

Причастен: Радуйтесь, праведнии: